

# «Daventar pli activs sin champ communal»

Partida populara svizra dal Grischun

DA GION NUTEGN STGIER / FMR

■ **Senza in cuntercandidat è Roman Hug vegnì elegì sco nov president da la pps grischuna. El remplazza Heinz Brand, dapi il 2012 parsura da quella partida. Il cumià è stà per el in mument emoziunal. L'antierur cusseglier naziunal ha ditg che cun Berna vegnia el vnavant ad avoir contact.** L'interess per la radunanza da delegads a Jenins è stà immens grond cun 120 delegads e delegadas preschents. Vitiers èn er anc vegnids bunamain tants simpatisants e simpatisantas da la pps. Tema central da l'occurranza è stada la tscherna dal nov president da la partida. Cun in ferm applaus han ils preschents elegì *Roman Hug*, l'unic candidat, sco successur da *Heinz Brand*. El è stà dapi otg onns al timun da la pps dal Grischun. Da lez temp è el vegnì successur da *Jon Peider Lemm* ch'era stà quatter onns parsura da la pps grischuna.



Il nov president da la pps grischuna Roman Hug (a san.) cun ses antecessur Heinz Brand.

FOTO G. N. STGIER

## Sustegn da la populaziun

Losch saja el tuttina che la pps haja anc adina ina quota d'electurs da bunamain 30% e quai confermia ch'ella haja in fitg grond sustegn da la populaziun grischuna. Cun excepziun da la Surselva saja la pps bain represchentada en tut las regiuns dal Grischun, ha ditg Brand. Da preschent saja el londervi da prender cumià da Berna, da ses amis da partida ed er collegas d'autras partidas. Cun la chapitala svizra haja el er en l'avegnir contact cun esser president da l'organisasiun Santésuisse, ha manegià Brand. L'entir manaschi politic, quel vegnia segir a mancar ad el en il futur. Brand deplurescha ch'il suveran grischun n'haja betg propi chapì ch'el fiss vegnì il 2021 president dal cussegl naziunal, quai che fiss stà in'onur per il Grischun. Da sia betg reelecziun saja quella realità la pli gronda plaja, ha ditg l'um da 65 onns. Ussa haja

el dapli temp per far bellas turas da bike, viagià cun sia dunna, sa retrair da sia professiun, ir a viandar e cunzunt avair in pau dapli temp per la famiglia. L'emprima destinaziun vegnia ad esser la Spagna e lura in viadi pli lung en l'Australia.

## Datiers a la glied

Sia partida sa numna partida populara e quai duess ella er esser en l'avegnir, punctuescha Hug. El è da l'avis ch'en l'avegnir duaja la pps grischuna esser anc pli datiers a la glied e quai en tut las Vals dal Grischun. Da vegnir anc pli en vischinanza da la populaziun, quai saja ina da sias grondas sfidas, ha punctuà il deputà da 39 onns. Savens na vegnia la pps betg prendida serius sco partida populara e quai vules el midar. In ulteriur pensum saja er da vegnir tar novs commembers, cunzunt commembers giuvens, quai che saja dentant er in problem tar outras par-

tidas, menziuna Hug. Politicamain vules il nov president da la pps grischuna che sia partida saja pli represchentada en las executivas da vischnanca, en ils parlaments communaux e lura er en il cussegl grond. Gia ussa saja da sa focussar sin las elecziuns chantunales dal 2022 cun avair suenter quellas in represchentant en la regenza ed avair in pau dapli deputads ch'actualmain.

## Set personas en la direcziun

Elegì han ils delegads er las personas che fan part da la direcziun da la pps grischuna. Al timun è da nov Roman Hug, el che vegn sustegnì da duas vicepresidentas ed in vicepresident. Quai èn cussegliera naziunala *Magdalena Martullo*, *Valérie Favre Accola* e *Walter Hegner*. President da la fracziun resta per ils proxims trais onns *Jan Koch*, e secretari resta sco fin ussa *Reto Rauch*. Da nov schef da medias daven-

ta *Jann Thöny*. A la suprastanza da la pps grischuna appartegnan 16 umens e naginas dunnas.

## «Jau beneventass ina candidatura»

Quai che pertutga la tscherna communal da Tavau cun sa retrair il landamma *Tarzius Caviezel* ha ditg Roman Hug: «Jau beneventass ina candidatura da *Valérie Favre Accola* per la successiun dal mistral partent da Tavau.» Ella haja repetidamain confermà d'esser qualifigada e quai en plirs gremis politics. La dunna saja seriusa, fidada e credibla. Decider a la fin finala per, ubain cunter ina candidatura da Favre Accola sco successura da Caviezel haja la secziun locala da la pps Tavau. Quai saja lura er il cas en la citad da Cuira quai che pertutga la successiun dal cusseglier da la citad *Tom Leibundgut*, punctuescha Hug.